


O! Dodde zien vouten



Zo laank stoa k hier al... Mit mien swoare lompe vouten net op dij zaandbult doar Dollard vrouger aan tou kwam. Lichtvouteger was k vrouger, moar stoaregaan bin k nou volledeg mit mien omgeven vergruid.

Mien tonen kin je al laank nait meer zain. Ze hebben stroat en t voutpad dij veur mie langs lopen al zo voak vannijs bestroat, dat auto's, fietsen en woagens mit mizze mie aalweg dichter aan knibbels veurbie kommen. Zo komt mien veurdeurtje aal leger te liggen. "Denk om het afstapje".



Achter mie op t kerkhof hebben ze al zo voak aan t groaven west, dat mie t zaand doar ook aal hoger komt. Mit deure aan westkaande is t dus al nait veul beter.

Ik ben altied al n lutje west. Veul klaainer as kerke achter mie. Nee n jenteg spits torentje bin k nait. n Beetje lomp en dik, net wat ie zeggen: n dodde. Zo nuimen ze mie ook. "O! Dodde".

t Is nou, loat ais kieken, zo'n lutje 725 joar leden dat ik hier in Noordbrouk te lande kwam. n Mooi stee wel, zo in t noorden van t dorp, bie t kruuspunt. Houveul verkeer der in de loop van dij joaren al wel nait aan mie veurbietrokken is ! Doar heb je gain wait van! Noar t noor-

den, richten Sibboeren. Noar t oosten noar Brouksterhamrik, Nij-scheemde, t Woar. Of noar t zuden, wieder t dorp of richten Zuudbrouk. t Mouten aal mooie dorpen wezen, heb k voak heurd. Moar ik kom hier ja nait van t stee of en ik kin der ja glad niks van zain. Mit mien lengte van zestien meter kin k nait zo wied kieken en dat muit mie.

t Is dat ik zo nou en din nog ais luden mag, aans zol k mie ja dood vervelen. t Mooiste is dat in nacht van ol- op nijjoar. Haile nacht deur luden ze din mien swoare klok. Ja, dij mag der wezen mit zien 1666 kilo en deursnee van 137 centimeter. In mien dikke muren zitten gaalmgoaten, zodat ze mie ook wiederop goud heuren kinnen. t Is maal dat ik t zeggen mout, moar t is mien tweede klokke al. d' Eerste, dij van 1817 was, is in 1943 deur Duitsers vothoald. Moar Klokken-gaiterij van Van Bergen in Hailegerlee het mien nije goten dou dij male tweede Wereldoorlog veurbie was. Joa man, as je hier zo laank stoaan, mout je hail wat mitmoaken. Zulfs daiven, leeglopers en zoelappen hebben ze in mie opsloten vrouger, al is dat al wel meer as 150 joar leden.

Mor kloagen dou ik nait. Ik stoa hier best, midden maank, mooie bomen, mit n mooi oetzicht en zo stoef bie dij olle kerk en pastorie. En ze hebben hier tegenover, in de oldste Oldambster boerderij, n striekiezermuseum onderbrocht. Man, glad n oardeghaid, veur zowied ik t hiervandoan zain kin.

Nee, kloagen dou ik nait. En toch... as je hier al zo laank stoaan, wil je ook wel ais wat wiederop rondkieken. Mit mien muren van 1.90 tot 2.35 meter lukt mie t jammer genog nait ook mor ain centimeter van t stee te kommen... Ik mout wel stoaan blieven woar ik stoa.

Man, man, ik krieg stoaregaan toch zo'n sloap in t bain...

okt 89 JUR ENGELS

